



大雲樓集



序

梅石之間南北相去僅二十
里橫受諸山羅列左右而長
水貫其中淵渟峰峙殊饒蔥
秀每多風雅之士唐以前無
攷矣若橫山顧著作况以詩
名至德間元季貝廣文瓊鮑

同治

樓

徵士恂繼起于後代不乏人
前輩鄭平子顧文玉兩先生
薰猶及見也卽今

天子右文明經制科而外不廢
宏詞一時騷雅鬱興或趨宋
元爲從新者昔人云六朝不
必學漢魏三唐不必學六朝

余亦謂宋不必學唐元不必
學宋今又何必學宋元乎客
有問余詩者嘗語之曰論詩
如論美人辭同脂粉意別貞
淫其性靈風致則由天縱非
盡人力故太真之豐不如梅
妃之瘦小姑之少不如徐孀

之老或有不甘學步效顰而
故作啼粧愁眉者此詩家外
道也硤石張子球仲出余老
友雪鎧道人之門學詩有年
矣一日持所著屬余序卒讀
之大都雅秀冲逸近體類嘉
隆諸公而樂府寓婉于直絕

似西涯擬之唐人則起家錢
劉且升王孟之堂矣獨是太
冲問序皇甫當時玄晏竊得
文章聲足爲傖父生色而余
也七十老人日從農夫牧子
作耕田歌爲飯牛唱張子翮
翮英妙恐不在余言輕重也

長水丹崖蔣

薰題



序

夫人情之慄舒因乎天侈侈則
俗時政之興衰彼繫焉先王重
有採風之制於時輜軒旅下郡
國也隱得以上聞太史令考聲
律而奏之及備國風以時省覽甚



卷典也自採風廣於戰代而騷賦
興焉故曰離騷者猶離憂賦者古詩
之流也然耶否耶迨漢武帝時廼
立樂府採風詩俾宮人夜誦曰相
和曲魏明帝用之唐玄宗游宮率令
近臣應制後憲廷廣歌之舊而都

人士行卷得以伏闕上陳者漢魏至唐
聲詩之盛豈後代所可及哉自貞
觀大曆以餘沒者幾有詩亡之嘆而詩
北亡也周禮六詩之教亡耳且夫士先
率教而求工採風雲月露之辭雖工
不雅矣惟賦亡云賦以廣宸博雅之

士之優之，詎能使作者與讀者各有飄然凌雲氣而上之者乎？曲終雅奏，如文園之婢，揚班却步者乎？蓋夫華後之士，則不然。吾鄉張子求仲，昆季也。時俊也。求仲以選士入都，志氣弘達，有類君家。平子初上軍，原有

張君之子，概且與觀朝貢，明堂之儀，似陳修文，偃武之宴，為賦玉衡，而詠昇平，寧不陋披羽獵，而嘆靈槁。比目之為傳者，自古迄詩風神，似今則兼曲江，嘉州樂府，寄情與衍，則儼獸旅東，楚從，去進，聖作者之堂。

寧有艾歟

天子右文公卿之士金馬玉堂之署皆海
內名流不次羅致之地雲霄張子起
家博士應詞林其以茲集為行卷
可乎神物之出光氣先見余竊
於斗分早瞻之氣是為敘

康熙系在壬戌陽月望同里止溪
圃人朱嘉徵題并書時年八
十有一



序

自昔兄弟以詩名者不可更
僕數其炳烺在人耳目則有
雲間三陸陳郡三謝信都三
張然機雲齊名住東西兩頭
而耽不與焉康樂每對惠連

輒得佳句玄暉激傷細弱一篇之中自有玉石至于孟陽景陽不相上下而季陽才藻便不逮二昆甚矣夫論詩兄弟間不能無軒輊也乃吾所知海昌白也仲張兄弟自摠

角時即藉之有詩名仲張及予門習見其詩集中大都門內倡酬壘篋迭吹允稱伯仲竅後球仲來京師屢辱贈言如初發芙蓉自然可愛及索其裝匣中稿則爛若舒錦無

處不嘉較之白也伯仲駸
乎才力悉敵不肯讓美於哲
兄矣球仲聞予言矍然避席
自謝勿如予益愛其謙抑耻
作周阿奴火攻而十樣蠻箋
不必助小韓造五鳳樓也今

仲張宦遊薊門白也獨處秦
溪球仲又抗顏為師寄迹首
菴齋舍一時離索之感益足
鼓吹詩腸追念平昔聚首一
堂闡題拈韻倡予和女且邈
若河漢則永嘉西堂之夢池

塘春草之歌能無再見耶予
素不喜剗刷間有題詠輒復
投之亂紙敗簾中然每見聯
珠合璧之作即把玩不置比
之榧楠杞梓區別其材橘柚
楂梨品嘗其味則球仲所著

亦何妨布之鉛槧使天下知
海昌張氏之詩可與信都三
張方幅齒遇也茲是為序
龍眠友人張英敦復氏題



序

僕聞之飲水必測其源根枝
必求其本後之君子執醴泉
芝州之說置原本於不問亦
謬矣鹽官詞賦之淵藪也薦
紳先生篇什獻酬大都較著

其隱於詩者不少概見前代
惟蘇氏兄弟藉、有聲至今
選家采錄以三蘇名世云嗣
后則有盛叟無彊終老於詩
而絕不以詩名也張子樞六
盛之自出雅好詩古歌行頗

得漢魏之遺五七近體清逸
不佻於唐似宗錢劉元白宋
則放翁一家家所欣玩詩餘
不作唐宋以下語燦然成帙
見質於僕。竊異之樞六方
銳意舉子業咕嗶揣摩日不

暇給而聲韻之學一旦入格
乃爾權六果何所本耶說者
曰此權六之緒餘也才人何
所不可僕不謂然盲女彈絲
俳優胡管鼻聲樵唱嘔啞榜
歌其鳴也必得其傳况正始

之音哉吾知權六所從來者
必有在矣及閱無疆詩集始
知無疆老於詩權六固從之
游而得其傳者也無疆無后
且極貧權六日饋盤飧無疆
得肆其吟嘯其歿也權六買

地瘞之并取其平生長短吟
而悉付之梓是權六受詩於
無疆而無疆之詩藉權六以
不泯固當世之美談也夫無
疆隱於詩不欲有詩名故其
詩益高權六就閒冷官衙居

然吏隱率諸弟子沐浴鄒魯
之禮樂渢々乎絃誦不輟其
詩必益進然吾觀權六年富
力強將登著作之庭極賡和
之樂調叶宮商聲出金石以
黼黻太平必優為之也則權

六不患不以詩名天下無疆
不有權六幾不知有無疆之
詩彼窮崖空谷稿項黃馘獨
寐寤歌老死而詩磨滅者可
勝道哉僕故表而出之使作
詩者知鹽官高士詩三蘓之

后尚有盛氏而盛氏詩學歸
之權六嗟乎權六得此六不
俗矣

武林友生顧豹文題



序

余硤人也但知硤事硤山古亦稱夾谷谷水淳注
兩峰夾峙其衝貫若長虹崢泓而蕭曠宜有英靈
奇傑之才出而應之近古以來而未之見也自唐
著作郎顧逋翁况始以風雅啟疆茲土而風遂壹
壹焉况世居橫山之陰去硤數里而近旣愛審山
北野林壑幽秀遂築別墅居之其詩所云家住雙
峰蘭若邊是也晚而所構益富所造愈神如遠寺
吐珠閣春潮浮綠烟直可凌顏軼謝與鄴下齊驅

當時劉夢得白香山章孝標間多登覽之作皆宦
游而非土著降而宋元喬隱此中者實多名雋如
施彥執貢迻甫貝清江諸公咏物遣懷俱足爲山
川增色至明而作者尤彬彬矣如唐聖言之樵吟
錄朱朗初之春雨編周尚敬之澹齋稿沈天用之
淳樸園周青羊之疑夢編皆見重于藝林垂聲于
誌乘近數十年而此風遂寥寥焉蓋英彥鬱起戶
聞絃誦要皆以全力控制藝而于聲律之途特賈
其餘勇故菁華雖炳而未登闡奧張子球仲于揣

摩之餘覃思研精卓然克自名家邇來詩律漸靡
折揚皇荇足以變俗張子力追正始猶有尹姁大
家之風今觀大雲樓集豈但與樵吟春雨諸編輝
映前後直可繼逋翁而振其逸響也已山川之氣
將以復洩其竒所爲英靈秀傑之才于張子必有
當也他日居著作而抽毫宜以是集爲先資焉

海峽樵人潘廷章漫述



大雲樓集

微山張 韜權六著

採蘭賦

素交會課

青陽司候土膏物華百卉未腓幽蘭始花夫以耿
介絕俗之姿共春草而爭榮靈均既已沒鄭俗安
足同香不求知美非綠色徜徉于幽谷之中放弃
于清湘之側而欲與首陽薇蕨冀邀義士之一顧
吾見其鬱紆孤立而莫之和也已然其清風所被
衆皆悅之則有燕趙鄭衛之墟幽閑貞靜之女簪橫

綵燕粧落玉梅鉛花不御容光自輝怨春芳之
易晚獨仰首而延佇值流鶯之對對羌伊嚶其如
語含情歛恨却立盤桓涉彼高岡言采其蘭于是
有若頤者若笑者歌者舞者昂然怒者斜睇者遠
盼者含羞不語者向日者迎風者背陰者吸露者
駢立團結者高者下者飛者伏者盡態極妍皆欲
得當佳人之採摘焉爾乃素手輕揚掇拾維均芳
心自解志氣可親花兮人小影人兮花後身何知
人之爲花耶花之爲人耶爾乃迴凌波之步登沉

香之亭屏催花之鼓揚護花之鈴薦龍鳳之茶操
猗蘭之琴座中春滿江上峰清又續而爲採蘭之
歌歌曰蘭生兮山之陽雲爲衣兮霧爲裳朝餐玉
露兮暮浥瓊漿誰其擷之登明堂國香拂拂薦君
王化爲清風兮被萬方

擬璿璣玉衡賦

蓋聞天垂象見吉凶聖人則之故黃帝建立五
官顓頊乃命二正虞書曰在璿璣玉衡以齊七
政璣衡之說始見于此秦灰既冷洛下闕拾其
緒餘歷代推行或爲銅儀或爲鐵儀或爲木儀
又或爲簡儀及諸儀象總不外璣衡遺意

聖天子乘乾出震秉陽御陰法天之精意必有出于
儀象之先者草莽愚臣敬獻賦曰

登靈臺以騁望兮邈天步之難尋有開天之神聖

今攬造化于一身出陽納陰旋乾轉坤三光代其
明四序錯其行德敷而政成民和年豐鬼神來歆
風雨以時萬物向榮于是運其靈竒創爲秘器萬
世同規長八尺而爲衡周二丈五尺而成璣飾以
觀日之玉不夜之珠三辰外朗四游中輝六合爲
帶二極低昂赤道斜絡乎天腹黃道綿亘乎東西
爾乃激水運丸隨璣轉轂橫玉管而平窺順斗樞
而上矚靈鳥東指恍睹扶桑玉兔西迴儼臨蟾窟
何須夸父之追不必方諸之對星分經緯左右交

馳五星遲速不離睂睫之間列宿森羅卽在轉圜
之內三百六十五度徑寸堪求九萬六千餘里移
時可會薄蝕次舍曾不爽乎鎔銖羸縮疾徐豫可
卜其進退于以占二氣之升沉定四時以成歲若
乃霜飛六月星孛大辰涓誣太白酒勸長庚璿璣
不忒玉衡無睽而垂氣致沴昊天降威今

天子建皇極陳五事參五行受五福羅九疇驅馭陰
陽節宣風雨遐氓矯首跂足罔不沐膏澤而咏勤
苦天誅所加鯨鯢授首蠶厥渠魁肆其羣醜剖璣

析衡而四氣不違置器忘象而天心如觀直將觀
化于一畫之初窮神于無極之表湛然虛靈萬方
同照容成無以測其數甘石莫能喻其巧區區欲
與壽昌平子競勝爭奇云爾哉意者以理不忘象
道難廢器瞻欽若于中天踵授時于帝世爰命司
天津陳大寶藏之太府垂于億兆八荒同闔萬象
瞻雲亘終古而一天抑亦歷萬年而一君亂曰茫
茫宇宙變無極兮一以生萬萬復一分成象成形
道之迹兮法天行健至誠無息兮

樂府

金川燕

金川燕入鳳巢探鳳雛鳳雛奔奔喪厥家叶三十
年來流落江湖金川燕易鳳雛營燕巢十五五
乳燕成行將復爭巢羽脩脩尾翹翹音嘒嘒

死景清

景大夫忍死二月肝腸枯進旅退旅誰念臣孤緝
衣直入當星變殿上傳呼七首見景大夫可若何
君仇未報殘此千金軀景大夫血模糊嗔仇衣入

宮爲厲化作子規飛

南城鳥

南城鳥飛身不敢度獨有老鳥止其下叶老鳥有翼弗能飛哀鳴夜繞南城樹天子怒伐南城樹老鳥懾息莫可止既毀我室毋取我子

殿上書

白日忽以微太阿落闔豎神靈不忍宗廟之顛覆金章玉宇從空下叶不辨書中意但究作書人黃門小豎持金瓜紛紛爭向奉天門

卿雲見

黃河澄卿雲見駕唐虞軼秦漢王英武好用兵殺人無算學長生五利之後有文成紛紛仙客來帝京賞賜億萬天下貧悲風瑟瑟搖茂陵至今松柏猶秋聲

楊漣怨

鑿與晏駕乾清官牝雞之晨驚真龍排闥豈謂微臣功一朝切直忤上公詔書星飛下九重鞠死微臣如蟻蟲微臣敢愛死但恐臣死之後家國空皂

鷓鴣蕭蕭乘秋風

刺逢子

刺逢子何離離飛蝗不忍食人取以療飢長安使
者驚且走索而啖之螫其口封章疾奏鴻雁啼九
重高高知不知

雙鉞謠

左仗鉞殺諫臣右仗鉞驅齊民中官阿丑知大體
諸諫能令至尊喜須臾太阿獨自持咄嗟雙鉞皆
披靡

刺血疏

父死忠子死孝忠孝一門君念之君念之死亦足
夕陽衰草雷州役父子相持中道哭

柳鎖香

柳鎖香爭看員外郎十罪五奸不可破微臣一死
負君王微臣得死死已遲馬市邊風戰血吹忠魂
杳杳夜臺上蕭瑟還如狄道時

大雲樓集 詩

春風曲

微山張 韜權六著

春風先逐寒梅發
庾嶺梅開冬十月
老榦斜連楚澤雲
清香低壓蛾眉雪
雪盡春風二月天
萋萋芳草劇堪憐
陌頭楊柳搖金線
檻外黃鸝咽畫船
畫船齊處春風早
桃李枝頭花嫋嫋
誰家年少踏春來
金鞭欲下驚飛鳥
瓊樓百尺倚青霄
美人宴坐吹洞簫
安得凌風鼓雙翰
長堤佇立空煩勞
高髻

羅衣淺澹粧閒亭獨自舞霓裳也知不入時人眼
憔悴容顏對夕陽夕陽西下春風起花飛片片隨
流水南山松柏獨青青不得春風亦自美

花朝西崑雨集

深山何處問胡麻雙屐衝泥一徑斜積雪欲封雲
外寺濃陰時覆雨中花林泉詞賦推梁苑兄弟風
流愧謝家日暮不愁溪路滑洞門彷彿見浮槎

送別徐子他山次顧悔我韻

一片閒雲隨處家東西南北任浮槎清歌落日催

歸鳥放筆晴山送早霞白社今來推畫史紅樓別

後憶蘭花

他山善墨蘭微山
女校書受業門下

風光如此真堪戀相

待還期六月瓜

春夜小集和陳子允大

兩山中斷草堂開陋巷春風車馬來舊醞恰逢花
底熟新詩共向月中裁歌成白雪浮雲斂韻協清
商急雨催好鳥枝頭求友切誰能吟眺獨徘徊

題陸介菴十美圖

人物生于情情盡無萬類太上始忘情鍾情正吾

葦味者苦情多反爲情所累雲間有一龍倜儻任
豪氣幡然投不律自從湖海志遨遊五嶽間養空
何所係敷衽觀古今稱觴藐天地忽將不染身闌
入多情隊洞簫聲嗚嗚玉琴响切切叶狂客發興
奇一石亦不醉旣解讌紅裙何妨飲文字靖節松
筠操閒情何旖旎廣平鐵石心梅花自嫵媚敲冰
取茗戰學士誠無愧琴操參坡公六幅瀟湘意藍
橋路匪遙瓊漿締仙妹天台有遺踪香風送環珮
羅什能吞針畜女秦何憊摩登幻阿難大乘匪小
試三教本同原總爲情會聚情盡復生情有無自
一致收拾畫圖間瓢笠何常處

贈徐他山二首

何來奇服者屈子是前身神以澹逾遠筆從閒更
真耽詩不覺懶痛飲未言貧九畹持相贈芳生茅
屋春

湖上多高隱惟君更異人畫蘭供嘯傲捉筆見精
神朔氣侵行幄金風逐去輪相逢不忍別前路且
逡巡

解蘭石夫子督學江南見招

愧乏汝南譽偏勤江左招高堂悲雪髯曉露濕星
輶路入邗溝月風迴震澤潮廣陵春水晚橋畔有
吹簫

登北固山

危峰兀立瞰江南鐵甕平臨江水涵地勢欲吞雄
虎穴浪花不動老龍潭驚波常嘆投鞭意高碣誰
堪捫蝨談起舞祖生應有志臨流擊楫興初酣

送別韓城解蘭石學憲

匹馬京華客夢勞追陪時憶廣陵濤千秋水鑑存
吾道兩載冰心見特操別岸好山迎畫鷁長橋初
日上征袍試聽南國謳歌者盡道龍門萬仞高

滹沱河和王貽上先生韻

悲風謾謾馬頭生易水鳴鞭春漲平萬里雄圖歸
督亢千秋遺恨泣荆卿鄉心懶聽關山調客路長
驚草木兵垂轡斜陽烟樹晚野花幾點接荒城

易水

易水秋風厲臨流感慨生存亡三尺劍生死百年

情後客來何暮前驅已抗旌空令擊筑士萬古泣
高荆

金臺懷古

冀北饒良馬賢王高築臺千金市駿骨萬乘待龍
媒卽墨圍初合聊城箭可哀寧知牛尾力矯捷過
駝駭

和澹漪女子題張夏旅壁三首

一鞭斜日映孤征野店村烟車馬停壁上誰留千
古怨斷腸塞草一時青

朝辭故國暮天涯旅夢無憑也識家一句詩成千
點淚不緣飄泊似楊花

燕飛猶得傍金閨舊壘新巢不暫違我亦飄零悲
斷綆不堪杜宇復催歸

旅懷

夢迴不識關山杏落葉空庭懶未掃去家正當桃
李花風起白蘋天欲老獨自憑闌夜漏長二十五
點難爲曉衾寒篔簹薄燭影孤碧梧枝上驚棲鳥行
雲片片逗疎簾軒車蹠蹠長安道

寓金臺有懷舍弟晉方

平生惟一弟風雨足良朋薄業牽人去高臺獨自
登疲驢朝躡雪火伴夜敲冰日望南來雁金波冷
玉繩

俠客

生不慕榮貴一身亦自尊過客時相訪黃金置盤
殮男兒死易耳何能受人恩

酒徒

相逢惟有酒相別惟有酒相離數十載酒量加增

否明旦入新豐沽酒較勝負

才子

至文滿天地萬卷書不盡感觸偶成章工拙從人
定蕭然獨往來野鶴時相近

麗人

粧澹偏增麗媚人不在目別自有深情秋風吹黃
菊歌臺月夜輝絲管暫徵逐

祝周乘鹿煉師七十壽詩并序

蓋聞懷真宅一偕造化以同遊養祖含三後

乾坤而不老是以列名紫誥兒視彭佺託體玄
門友呼期美狀而茹松換骨多憑服食延年賣
藥潛形亦假神奇炫俗月明嶺上何處吹笙花
落洞門幾人問渡有周翁乘鹿者丘壑清姿烟
霞雋品早年入道脫塵網以如遺雅志尋師契
靈宗而長往柳風桐露未足喻其蕭疎雪映冰
融詎能方其朗潔已乃寄跡東岑怡情北墅羅
處士之山居長林豐草林逋翁之石隱鶴子梅
妻晞衣羅月鐙浮丹井之霞策杖巖化屐破書

臺之翠木落千林御風如列雲侵半榻化蝶疑
莊加以藻思飈生逸趣天半金壺瀉汁自寫黃
庭玉甕浮香慵牋丹訣禮罷瑤壇間譜遊仙之
句種來叢桂長哦招隱之歌松風吹塵尾頻翻
珠璣錯落竹雨和碁聲爭亂星斗縱橫五千言
泰朕自得七十載澹乎忘老茲者芳春令節斗
降良辰萬樹堂開乍聽新鶯之轉綠數枝花放
爭看乳蕊之舒紅擘蒼麟以侑爵客自三山跨
黃鵠以稱觴酒名千日虬髯如雪豪爽長存玉

顏半醜精神復少介茲眉壽媿無素蓮紅蔕之
珍遡我心期可乏流水高山之曲敬陳短頌用
祝遐齡從此西園片席須位置吾兩人佇望南
極六星直輝聯于雙峽云

東山之阿多竒石石上長松高百尺干雲溜雨老
龍鱗往往流脂凝琥珀藤花燦爛丹井窩林禽嘯
唳桃源宅一聲清磬曉烟橫珠宮岌業憑虛白茗
椀棋枰玉局牀相逢盡是餐霞客中有代毛山澤
雕浩肤紫氣盈雙碧顏如渥丹胸垂鬚階峻尋芳

時蠟屐金鼎烟霞石號黃瑤天鸞鳳城名赤珊瑚
裝管渥丹符玳瑁爲鍾泛靈液閒庭對客飯青精
仰天長噴蜂奕奕羽服蹁躑雀不如前身知是神
仙謫五岳呈圖王屋丹瑤島瓊樓擬分席自言今
春七十矣竹杖臨空戲一擲玄圃青泥來東海鸞
笙象管張西掖葡萄美酒鬱螺卮看君一飲傾三
百

渡江

揚子江心渡東風鼓棹初山光搖北固春色帶南

徐燕掠紅潮急鶯啼綠柳疎客遊良不薄未忍憶
鱸魚

采石磯

艤舟懷太白江色晚蒼蒼壯志成詩聖長才作酒
狂雲依楓樹紫草帶菊花黃獨有磯邊月年年到
夜郎

金陵登報恩寺塔

秣陵龍虎地高墉鬱萑蒐碧瓦皆金色丹檻盡上
材烟雲三殿合風雨五陵來向晚江舟集長干賈

客回

雨花臺

金風寒講席誰復見飛花古戍雲千嶂秋林月萬
家鄉心同逝水客夢倚悲笳日暮憑闌望天高雁
字斜

故陵

荒林惟茂草古殿坐秋風碧瓦籠雞桀銅駝出故
宮千山疑向背萬水自西東頭白老宮鹽當爐夕
照中

大雲樓詩集
九
方公祠

異代還存廟千秋氣若生
衰麻臣主諗痛哭古今
情日落山河沒天高雁鷺平
一腔忠義淚盡向夕陽傾

景公祠

遺廟瓊臺畔雄風曉夜吹
緋衣猶帶血青史自含
悲忠孝惟人盡艱難獨爾爲
婁朕腸斷處暮雨嘯寒鴟

寄奉張敦復夫子二首

四海聲名仰斗山十年忠讜侍龍顏
屢分天上金蓮炬獨冠人間玉筍班
麟筆露寒青簡濕鳳章雲藹紫泥斑
孤帆借得東風便喜近蓬萊碧水間
柳迷青瑣玉堂遙更幸瑤池起鳳毛
客路正當二月暮家聲競仰五雲高
淮南草長書郵隔塞北鶯啼詩思豪
別後幾瞻千里月澹雲籠樹滿江臯

寄懷韓城解世兄二首

翩翩弱冠五陵豪桃李公門識俊髦
淮市春風憑月旦隨堤烟柳染霜毫

舊從蘭石夫子較文廣陵

思親共抱千

秋淚予自北歸痛遭大故而世兄亦遼丁外艱破浪誰爭萬里濤兩地

相思江水濶片帆飛渡夢魂勞

君歸一雁謝衡陽遠道悠悠離思長曉雨欲來花
冉冉孤雲不度山蒼蒼龍門百尺魚書杳濠水千
迴桃浪香知爾懸情似明月照人異地各沾裳

奉寄顧樸園夫子

雲擁蓬萊落九天夔龍位接衮衣前書成石室踰
千軸賦就甘泉第幾篇花近紫微傳畫漏柳迷青
瑣結爐烟御筵夜半分蓮炬促草詞頭待曉宣

送仲張家兄北上

送別江舟暮蕭蕭蘆荻黃寒風踈古木獨雁帶斜
陽劍氣銷長樂歌聲徹建章聖朝方罷獵無事賦
長楊。

自題畫眉圖

朝畫眉晚畫眉畫眉甘向春風老富貴浮雲總不
知君不見王家兒驅車九折視如夷肯念牛衣對
泣時

西湖竹枝詞

樓臺十二俯清溪獨對春山唱大堤野蝶觸開楊
柳絮雙雙飛過斷橋西

郎比南峰儂北峰兩峰相對各西東那能一覺行
雲夢化作巫山並蒂峰

湖心亭

亭開四面山影入湖心裏秋光壓翠簾歌吹遠近
起漸次畫船齊香風散羅綺瀝酒魚鳥醉殘羹
僕喜薄暮各言歸雲合萬峰紫獨有孤亭在寂寥
委寒水

武穆祠

北風一何厲吹我南方宿南方風氣早陰霾蔽陽
谷日淡天淒淒白晝神鬼哭自古有君臣艱難一
人獨遺廟鎖空山蕭森惟古木鐵鑄奸臣形烏鴉
下豕肉

孤山宅

昔聞林處士遶屋種梅花至今孤山下老榦影欹
斜邊馬不敢繫遊人常嘆嗟孤亭對落日澄湖收
晚霞明月徘徊上漁笛隱蒹葭忽聞清唳聲獨鶴

歸天涯

六橋堤

六橋堤上柳樵悴知爲誰六橋堤下水嗚咽斷腸
時天馬渥洼來雙蹄疾於飛從教桃李路踏作錦
障泥依舊六橋堤春風何處吹萋萋芳草色悵望
王孫歸

雷峰塔

夕陽低萬山古塔紅雲現倒影入西湖筆蘸玻璃
硯霜毫秃已盡囊錐羞自獻何當揚清輝作賦靈

光殿唱和慈恩詩題名同羣彥不朕早歸來秋水
淨如練

飛來峯

奇峯森然立勢如雄虎踞或似龍鳳翔昂藏復軒
翥下臨冷泉亭泉聲達朝暮悠悠千百年水石互
吞吐或謂昔飛來何不復飛去紅塵徧九垓去住
兩無據

寄上張敦復夫子

冀北江南山萬里五雲深處扈神宮經筵靜夜聞

天語便殿非時接聖容見說燕臺新市駿欣逢伯
樂久從龍誰云剪拂遺家廐躑躅秋原憶曉風

寄懷張占臣世兄

京師六年別故人千里心秋風吹客夢春雨助豪
吟衆鳥啼空谷嬌鶯囀上林龍門行鼓浪虎觀坐
橫琴罷沐歸蓮幄恩沾賜錦深彈冠揚壯志擊筑
吐哀音大道無通塞高懷抗古今愁無萬卷益敢
畏二毛侵獨有思君意朝朝度北岑

贈戒上人

暖風習習透松關石磴縈紆次第攀足下縱橫皆
大道眼前光景卽深山禪心豈逐烟霞去慧力常
留天地間我亦臨筵參一笑舉頭惟見白雲閒

擬白香山登紫微山望硤石湖二首

偶從行部試登山減從停騶散步閒雲際望湖烟
澹蕩林中盤磴鳥間關壺漿父老提攜至冠蓋賓
朋禮數刪問俗正須從露冕好因遊賞悉時艱
南湖烟景曉溶溶眺望還應上此峯雨後綠肥松
徑滑春深青散柳堤濃雲連驛路成千折水繞人

家隱萬重太守風流人共識佇看野老盡扶筇

梅花壽會詩爲顧且菴夫子壽

誰識江河廊廟心高山流水自鳴琴
函關虛度青牛駕金闕遙傳驄馬吟
十載嘯歌臣舌在百年歲月主恩深
西湖不久留歸棹獨立高崗吐鳳音
籌時未許卧蒿萊十畝應知猿雀猜
北海樽罍流碧浪東山絲竹老莓苔
殿中舊識鳴騶吏湖上新栽處士梅
自有高風壽簡策豈同松栢祝徂徠

烟雨樓春望

旭日仍烟雨雕樓極望同春城紅影亂
釣艇綠陰濃小駐開晴浪清吟助曉風
黃鸝啼不見只在柳花叢

關雞石

突兀雙雞石東風苦關爭悠悠千百載
相顧孰先鳴

將軍帽

將軍百戰死遺冑成青峰夜雨秋聲至
哀吟四野蛩

磨劍池

錢王昔磨劍劍光雄射斗至今池內水猶作蛟龍
吼

走馬塘

策馬下長坂春山四面圍金丸落大鳥仰逐浮雲
飛

眠牛石

朝卧山頭雲暮吞峰頂月牧童鞭不起春雨生薇
蕨

天眼泉

誰云天有眼乃在地之中盛夏水泉涸嗟哉天眼
矇

鉢盂頂

山形如一盂下瞰碧雲寺日暮梵音高天花散滿
地

葛翁井

蔓草入烟霧仙翁何處家道傍有古井汲水見丹
砂

小桃源

一水入深源矮牆春寂莫疎林不見人日暮桃花
落

紫微洞

紅雨欲沉山晚涼風發發山僧抱甕來搖動空潭

月

烏夜村

起
月落萬山橫衆星光迤邐烏啼何處村望望寒烟

飲牡丹花下同徐丈子開陳子雖嗜徐子六

與賦

歷盡春風見牡丹沉香亭北集衣冠太丘家學星
仍聚稚子清名榻未寒待把金樽邀皓月更吹玉
笛倚闌干長霄露滴花枝冷銀燭高燒帶醉看

贈溧陽裴使君二首

溧水吳山夢寐賒使君高節重天涯帆開長蕩風
千里路入平陵月萬家稻蟹尚留懸罄室尊鱸偏
入冷官衙訟庭竟日無人到古木蒼蒼散曙鴉

動地懽聲徹紫宸偏從盤錯覩經綸桑麻萬頃行
仙吏桃李千山照玉人烏下青雲鳧欲舉簾前白
日雉偏馴遙知姓字懸當宁百里那能借鳳麟

無題四首

三月濃桃映水紅金釵倦倚翠微中遊蜂不識留
春意任採花鬚又過東

山館芳菲麗日明綠陰深處暗藏鶯春來欲覓高
唐夢厭殺花前剝啄聲

深院迴廊月色新芙蓉帳煖百花春繡裯斜壓雲

鬟亂暗裏窺郎讀會真

銀燭高燒夢未迴渾忘玉漏爇相催微聞耳畔呼
郎起簾外晨光影落梅

壽讌篇上許西山夫子

客來海上說蓬瀛三山縹緲千層雲神仙事蹟徒
虛幻高人掩耳不欲聞何如河南許夫子千秋事
業垂青史父老懽呼祝太平吹竽擊鼓喧童稚我
欲壽君歌南山南山峻嶒高入天我欲壽君酌北
海北海濇漉長不改龍門晝永講堂開車馬春風

動地來從茲下里聞絃誦寂寂丘園閉綠苔乙卯
分闈嘆觀止公門枳棘皆桃李海內文人競識公
東脩雁雉紛遐邇邇來羣盜方弄兵調和補輯靡
時寧徵兵不聞刺義勇積穀直欲過常平又聞買
地澤枯骨白楊蕭蕭鬼誦德凡公所爲皆不朽無
非壽人兼壽國持此將以壽天下鹽梅舟楫尋常
話區區上壽何爲者仰望長天進杯斝

梅花十二詠步中峰大師韻

何處瑤臺欲降神疎林隱躍可尋真不虛端伯名

清友雅稱盧仝號美人五夜漢宮承雨露十年香
夢隔風塵橫空老榦天成傲不逐凡葩一例春
澹月微籠別有神花枝浮動影疑真登牆綽約如
窺客倚戶輕盈欲避人愛傍竹松添傲骨懶隨蜂
蝶鬪芳塵西湖日日喧車馬冷落林逋墓上春
澹粧淺抹弄姿神坐卧花間晤子真曾見香風傳
驛使亦分清夢到幽人山陰雪滿迎歸棹湖上花
飛落舞塵羸得樽前佳興在十千沽取甕頭春
曾向花陰得遠神依稀丰格記來真若非佩玉江

臯侶應是遺珠月下人鐵榦未慚何遜席冰姿寧
惹庾規塵陡然一夜瓊枝發打破愁城十日春
欲將好句報花神處處尋幽訪玉真庾嶺香生雲
滿樹孤山寒定月留人清風拂拂徐侵袂踈影娟
娟迥出塵幸有廣平新賦在何須重唱竹枝春
無計留芳減却神五更風雨惜真真吹殘羣玉山
頭雪驚起羅浮夢裏人千瓣落英全墜粉一枝冷
艷半隨塵夕陽芳草王孫路好景都歸桃李春
參橫月落暗傷神姑射仙姿擬未真瘦骨自憐同

野雀清標那肯傍時人含章殿內旋飛霰處士門
前絕點塵誰遣江樓吹鐵笛倚闌腸斷隴頭春
風前月下細傳神脂粉全消分外真另有丰姿能
濯魄本無妖艷可傾人枝橫細綴梁園雪香冷寧
沾紫陌塵自是天工深愛惜不教長近世間春
似從天上覩丰神說向凡間恐渾真瑤圃種來香
作骨碧城倚處玉爲人風飄桂子空先落月白梨
花總後塵珍重東君休浪擲亭亭留伴可憐春
花開花謝儘留神十二屏山徧寫真解語雪衣時

喚客驟來青鳥欲窺人移鐙泉月烹香屑策蹇霜
崖碎玉塵此段風流深領畧不須重借上林春
檀心半吐漾芳神玉骨冰肌想太真何必濃花傾
國色獨憐瓊樹傍佳人白雲冷浸金盤露綠霧香
迷玉殿塵二十四番風信早漫勞羯鼓更催春
破鵬經霜越顯神懸崖映水獨全真巖粧盡脫鮮
華相冷氣難親執熱人一曲羽衣銷粉黛千行銀
甲淨烽塵媽紅姹紫誰爭發領取東風第一春

蘭

豈隨高士老空山肯許樵夫漫刈蒿幽澗鳴琴泉
歷落芳林紉佩鳥綿蠻騷人作賦春相惜鄭女遊
觀晚未還幾度國香曾入夢上林迢遞絕躋攀

水仙

數朶寒花傍水阡若爲高潔得名仙蕭蕭似欲乘
風去皎皎真宐抱月眠色泛芙蓉猶帶冷香飄簷
蔔獨含玄誰能不吝纖纖手折贈佳人插鬢鮮

柳

綠楊偏得占芳辰半逐桃花植水濱是處垂條催

繫馬無邊離色送行人
章臺露折青青晚
古汴風飄細細塵
獨有陶家五柳在
年年三徑自生春

美人怨情三首

獨自清宵倚玉臺
空教明月逐人來
天涯一去無消息
接得魚書不忍開

綠楊影裏馬踟躕
馬上誰家馮子都
妾自有夫何處在
空言白晳座中殊

夜移銀燭燈花發
晨捲珠簾野鵲喧
打去燈花彈去鵲
惱人情緒斷人魂

雲貴蕩平恩詔四出喜而有賦

萬里南征靜鼓鼙
恩波早降鳳城西
遙瞻聖德同天地
俯慰蒼生望雨霓
曉日含花飛紫燕
春風繞樹囀黃鸝
漸無奇策標銅柱
滿酌金樽唱大堤

奉和昇平燕詩

有序

天地交而成泰明
良萃以作歌月殿
張燈喜月痕之新
滿陽春播曲際陽
德之始亨小臣霜入
貢有似登雲承

恩未能捧日嘗慕古
喜起明良之盛千載
而下穆

矣神馳况生際賡歌颺拜之朝率土之濱豈云
罔感敬步玉律仰續金聲其辭曰

帝德光昭彌萬方紅雲擁日啓神闈

維辟作聖股肱良惠風融融散百昌十日一雨有道
長太平之世無恒暘穀我士女富千廂擊壤歛

幽答

聖皇誕敷文教格遐荒頻年羽獵出長楊

天威有赫武備彰射夫既同弓矢張獻禽享烝歸廟
廊猗歟諸臣勤贊勅濟濟盈庭民所望功成作樂

命太常職司大禮屬后倉化施重譯來越裳桔
矢南金貢遠邦

天子萬年際春王嬌身迎春鳴且翔體天好生庶物
康野虞順時禁斧斨青衣倉玉陳明堂麒麟在
圓屏豺豸上元佳節與民慶君臣一德肩虞唐
火樹銀花接建章御膳因春進麥羊乾清開讌
恩無疆衆星宵依辰極光矢弧貫索俱掩芘史
占大有告豐穰

天顏愈霽臣益莊糾儀不用青簡霜雲門大夏鳴鏘

鏘天津橋畔細推詳侍臣以次拜受觴三爵不
醉惟德芳咸有一德追伊湯

君歌臣賡煥縹緗學崇緝熙時就將大文同天莫可
量草莽微臣謝勿違伏雌誰能立高岡滋蘭九
畹漸聞香忠孝節義厚自坊躬承古訓彌悚惶
六經古吹道之簧二十一史森琳琅讀書長日
倚匡牀逢人未敢說行藏側聞盛事神飛揚長
安日近天蒼蒼莪莪髦女思奉璋萬里凌霄羨
鳳凰安得高步效龍驤錦衣花帽垂明璫湛恩

躬被同濺汪矯首天衢零露灑嚴城擊鼓何嗶
皇蕭疎綠鬢對青陽暄勉我

王金玉相卿雲冉冉日月傍春燕雙飛入曲房翩翩
弱翅載低昂長歌微吟激清商濫佐廣文列下
庠夢入承明拜手颺

捷後

王師非好戰萬里靖邊烽古道連雲戍新恩胙土
封春風迴鉅鹿夜月照盧龍羈旅添愁色寒號處
處蛩

呈朱岷左先生

清風皎皎畏人知，獨有文章被海湄。
速客花前酣對酒，攜孫月下坐談詩。
太丘道學蒼松勁，洛社勛名白髮垂。
可許楊亭頻問字，高山流水慰相思。

呈蔣丹崖先生

彭澤歸來三徑秋，紫萸黃菊漫盈頭。
詩過大曆何傷老，酒釀中山不買愁。
藜閣晴宵思問字，剡溪雪夜暫迴舟。
運斤未得成風巧，潦倒還從匠石謀。

祝陳令輿

橫山蜿蜒如遊龍，勢挾風雲排碧空。
海水幾度變桑田，此龍高卧塵寰中。
幽人家住橫山曲，弱冠窮經貧亦足。
養成鱗甲羽毛奇，四十年來猶蠖伏。
龍子翩翾又會飛，飛向晴空作雨霓。
老龍高卧亦云樂，醉吸江河當壽卮。

呈王言遠先生

大道不在名抱璞，全其真性情成文章。
雄渾追先民輕舟下，急湍迴帆倚孤汀。
芳蘭蔽空谷，四野熙然春。
內顧樛櫟姿，樸斲恐無因。
大匠無弃材，滄海

愁問津

呈曹秋嶽先生

悠悠碛川水朝暮向北流龍門詎曰峻尺鯉敢輕
投喬松高百尺兀立萬峰頭細草亦懷春寥落依
孤洲伯樂能相顧駑馬成驂騑

蔣丹崖先生留飲補軒小詩寄謝

十里荷香蔣徑開竹風吹送野雲來花間小坐能
銷夏林下清言乍舉杯宣室未前文帝席衡門終
老伏生才清溪北注無窮極日日臨流一溯洄

贈朱大人遠

歌成白雪雲能遏韻叶清風暑不侵君自久鳴鸞
鳳曲我慚新學螭姑吟三山遠隔蓬萊迥一水遙
通溟渤深獨抱孤桐明月底好將逸調待知音

贈家靜菴在潛兩兄

幽居長夏著書宜小築溪山助采奇雨長綠苔連
惟石風吹紅葉上踈枝紫荆賦就詩千韻花萼樓
開酒一卮醉後不知前路永扁舟逆浪得歸遲

序

海昌張君權六司訓烏程者三載於茲日與博士
弟子講學談道孳匕不倦暇則賦詩言志所著大
雲樓集久爲騷壇所引重而同時秉鐸吾郡者竝
鉅儒名宿若馮君長民許君舜功王君載南文章
行設蔚然爲世所宗君於諸先生齒最少而才思
雋敏每當賓朋雅集命題刻燭清詞麗句灑落不
窮比學使者太倉王公校士我湖特器重君標其
文苑爲多士程式然君益退然若不逮予于是歎

服君之抱負爲不可及矣竊按今之州郡廣文卽古樂正大小胥之屬自后夔以典樂教胄子三代因之故大樂正習舞小樂正學干籥師學戈大胥擊鼓以節旄人教南樂士始入學卽歌宵雅之三篇古造士之法未有不教以樂者凡以涵養其身心使之從容成就而已今學宮所陳雅樂僅存其器耳其聲容度數已湮沒而不傳識者傷之愚謂詩與樂相表裏詩之貞淫正變卽古樂今樂之分故無論大篇短什始終條理靡不畢備若依古法

以五聲十二律按之則無詩不可被諸管此非好學深思之士不能得其解也君爲詩深醇澹遠始天授之音節而又得諸君子往來唱和以志一時人文之盛使讀者按節而求之一若金石絲竹之迭奏于吾前而干戚羽旄之繽紛進退揖讓于其左右也卽謂古樂得君而不泯豈過論哉夫區區之言雖不足以爲君重而詩與樂兩相維繫之故或亦今日之所當亟闢者故不辭而序之

茗上年家同學弟嚴允肇拜草

大雲樓集

海寧張 韜權六著

王子載南招遊白雀依韻酬謝

爽氣澄江渚扁舟逐浪輕
松濤天際捲雁陣日邊
生幽意凭孤棹高懷託
管城炊烟山樹起歸鳥促
飛觥

白雀松徑步載南韻

深林望不極一徑起蒼龍
風鼓濤聲壯雲移日影
重虛亭留野鹿怪石坐山農
笑指溪邊樹凌寒孰

與同

秋日邀同寅諸公登道場山和載南韻

秋光寂寂鳥聲閒
結伴提壺且看山
野鼠倒拖黃菊去
塞鴻斜趁白雲還
酒傾竹葉詩千疊
樺入蘆花月一灣
共喜太平多樂事
菱歌隱隱出溪間

載南新移紅梅

乍喜寒梅二月栽
輕紅移自白雲隈
印邊仙杏當春發
雪後山茶帶月開
瘦骨難教隨俗艷
疎枝只合傍詩臺
他年老幹凌空起
疑是羅浮夢裏來

同寅諸公偕訪黃子叙九郎次山拱樓原韻

幽棲不擇地
隨意掩松關
逕繞千竿竹
樓開四面山
長留風澹蕩
雜送鳥綿蠻
盡日闌干倚
歌成付小鬟

載南招飲花下卽次原韻

鶯啼春晝小
庭風燦爛江
梅映酒紅
日燦寒香浮
枕簟光添冷
艷射簾櫳偏
宜畫閣搖
書帶好伴詩
人理釣筒
潦倒攀輿成
獨醉喜聞
高唱入雲中
集同寅諸公小飲花下

習習和風拂敞廬梅花香裏駐高車不嫌小草偕
春醉應有清吟帶月書翠竹搖空迴舞燕綠楊覆
影樂游魚清閒莫負 天家俸上苑仙葩待客鋤

同寅招遊卞山

泛舟隨春波遂至北山寺松溝走虬龍爪牙紛博
噬翠竹千萬竿岡巒列體勢山風滯寒梅香飄殘
雪膩巖分精舍開豁達振林翳同心四五人落落
同家季草薰拂良辰詩僧一而二斗酒相娛樂野
蔬有餘味精鑿資道糧馥郁諸天氣行行又一里

古洞紅雲閉丹桂穿石出遠與羣峯會攀崖踞其
巔城郭峯如蜩榼身毋太高恐犯陰陽忌脩然賦
歸來晚霞催鼓柁惜哉茲遊遲逝將結澗契

寒食偕許子舜功馮子長民王子載南招同

梵林上人遊歸雲菴

彈指冬來一百六曉鶯蹄破窓前竹結伴尋幽訪
道峯蘭橈桂漿春風逐歸雲精舍藏名箋同人展
閱興悠然掛瓢堂內空飛燕太初墓畔草芊芊闌
珊老衲倦遊屐笑倚頑童足躡躡玉蘭花下坐觀

空綠楊影裏閒題石斜陽吹送酒百壺痛飲高歌
忘爾吾淋漓翰墨垂不朽我欲乘風泛五湖

馮子長民招飲碧桃花下

談笑清風裏濃桃覆酒杯小橋流曲水拳石枕蒼
苔映日花增艷凭欄錦作堆月明歸路迴疑向武
陵來

響臻堂小集招同黃子叙九許子舜功馮子

長民吳子來敏民則王子載南弟晉方及

體璠梵林兩上人

黃鳥間關風自南素心往往命前驂一時縱筆文

成萬率爾高吟雅肄三嘉客持盈皆抑抑老僧倚

醉忽誦誦更開香醞重傳盞月照西牕旅夢酣

花下醉歌贈載南

春已去夏方來櫻桃子纔熟薔薇花又開有酒盈
樽君不飲須臾明月照蒼苔車旣駕路迢遙客欲
留馬蕭蕭參橫斗轉天將旦滿地落紅香爛熳

載南招飲薔薇花下奉和馮子長民次白香

山三十韻

主人好幽趣不愛坐華堂留客情偏劇裁詩興未
央柳眠春已去蠶浴日初長硯傍珊瑚管杯浮琥
珀光談經開馬帳作賦擬芝房鼠鬣臨飛白鵞池
榻硬黃應借琴作友雅與鳳俱翔玉軸懸層疊牙
籤卸喬皇砌臺開曲徑壘石近迴廊乳燕飛來棟
嬌鶯鳴過牆梅移新歲月竹老舊風霜倩彼薔薇
色因之籬落香紫鬚留永日綠刺掛朝陽沉醉西
施面輕盈玉女扯胭脂沾舞袖錦繡惹詞勝繁艷
輸桃李微馨壓沅湘鈎衣垂顧盼落地碎芬芳乍

雨嬌無力初晴態不常枝稠蜂促迫葉暗蝶深藏
一座誇龍集千杯未酒狂盟言垂白首合志語同
方烟細香全透天青幕半張行雲隨意散歸鳥自
成行醇醴煩君設澆漓信爾匡明星驚燦爛皓月
逼光芒庭下風吹燭樽前露滴裳長歌呼太白捉
筆喚江郎高興追金谷清吟譜樂章有花邀共飲
勝地卽吾鄉三爵油然意願言以德將

簡謝吳子民則

一春花事頗相關開到荼蘼興未刪
羨醞煩君開

醉眼新詩贈我破愁顏風翻碁局香仍遠日捲朱
簾燕未還珍重韶光休浪擲含桃又見進雙鬟

次載南容膝軒四友韻

一鳥語一花香
一竹聲一石影

常時恒唧唧春至忽關關響籟凝猶散清音往復
還不因遊客開只伴野人閒午睡驚初覺幽棲似
遠山

何處清香遞踈籬千萬枝風前常共嗅雨後益相
思挿鬢非關色爲懷正及時酒闌人乍散蝶夢舞
參差

本自渭川植吹來風雨宵鏗鏘迹夜鼓泐滄挾秋
潮韻叶并州笛清移吳市簫鷄鳴天欲曙遺響更
寥寥

愛石自成趣天然未是癡窓中窺翠袖眼底盡山
姿盤攫疑爲虎蜿蜒竟似螭恐隨雲雨去保護百
千期

許子舜功益我堂落成同人宴集賦詩

昔我來茗署敝廬纔五間分二以爲寢厨寮參差
前左个陳甕甍右个列圖編堂上賓客喧堂下車

馬闌強欲設公座長狹如一船努力告親知湫隘
實可憐求金四五周始得結數椽我友乍來此與
我同昔苦荆榛長丈餘虺蝎遊庭戶刪刈見堂階
柱存根已腐相與謀改築斯事非易舉家饒梁棟
材命工運斤斧繩墨敢自由方員任規矩拮据歷
三月兵焉此華宇丹漆布門楹椽椽闔墻圃梁燕
鶯徘徊庭花增媚嫵庶邀同心人香醪兼肥荳旣
醉聊復吟隨意作賀語回頭顧我室相形益傴僂

次吳子民則咏罌粟花二十韻

立夏千花放當堦五色敷含元諒不異托體何爲
殊素質浮寒玉丹唇耀火珠青宜眉黛促綠帶鬢
雲鋪細剪紅綾皺長施紫綬紆亭亭如倚蓋曲曲
類張弧甲牧幽人共謙光君子俱欲伸先抑者小
往大來乎憶昔秋苗苗常懷冬雪虞崎嶇八九月
愛護百千逾葉幸紛糾結人誰賦麗都荒庭閒散
子隙地特寬租本草偶相錄群芳久不圖裝來甌
裏瘦載入詩中腴實勝名應減貌盈香始無駢肩
各自媚連茹不知孤酒對真堪樂風催劇可吁惟

間恒什襲幕外獨盤于向日開成苑凌雲鋤作區
良辰集勝友艷景同歡娛

次枕公自壽原韵

問柳尋花春事宜婆娑雙髻短筇支還將酒律催
人醉一任山靈笑我癡筇笠欹斜欲得句蒲團突
兀靜無思前身應是梅魂化雪裡清香玉一枝
清霜百鍊歲寒姿俯仰天心真不私絕磴縈紆山
鶴嘯懸崖側芳野猿啣鞦韆夜月眠鷓鴣楊柳春
風嘯畫眉且欲近尋王學士雙柑斗酒坐茅茨

筆底雌黃手自評吁嗟世譽有何榮胸中丘壑藏
真境畫裏峯巒見至情客館暮烟迷鳥道春城晨
雨帶鐘聲人間自有真山水北苑南宮浪得名
七十年來剩此身不妨僧帽更儒巾時從綠野尋
佳士懶向朱門謁大人飛錫偶然臨若下折蘆嘗
自憶江濱王喬張果徒虛白海外神仙獨爾真

次和馮長民響臻堂送罌粟十首

秋風吹子生夏雨別人去對面強依依銷魂仍處
處空負實如罌憔悴殊昔顏花闌未忍撒好鳥

猶關關 關關春未已 群卉忽以老 不及桐軒桐
凌寒勢夭矯 憶昔撒子夕 牽牛方渡河 比似與
花別 此情更如何 別離心惻惻 蕭條又及秋 但
候新苗長 結伴茲焉遊 蠶月吏事稀 閉門見皇
古常愛此花 嬌解語同鸚鵡 鸚鵡頗多慧 未能
邀我醉 今朝罌粟前 頽倒抑何易 我醉花亦歸
廓然留四壁 蒼苔白日間 多有殷洪蹟 但醉勿
復問 差覺睡鄉寬 夢裡作書札 猶及花平安 送
花多贈句 陡然歡喜生 翻愧主人薄 不及客多情

和經鋤堂詩

載南
堂名

伏羲一畫鋤 天地豁元竅 列聖有遺經 分植綿周
道 培滋灌溉深 方不負先覺 沾沾一家言 適取通
儒笑 勦襲旣失真 傅會亡至妙 勿忘亦勿助 長苗
實堅好 王子人中龍 理學恣尋討 義擢而仁耕 蘊
崇謹 莠草春風絳 帳開夜月鳴 琴悄登堂發 深省
浩歌出林杪 回首泮宮雲 花落禽聲曉

賦得深夜月當花次吳民則韵

畫裏雲山扇 底松栽來總是媿 真農惟看明月簾

前吐好比春花着意濃
溶溶玉貌倚高牆影落杯中淡不香誰折一枝歸
院落水壺萬里挹清光

叙

吾人所好惟有圖史琴書詩酒花竹而是數者與
簿書案牘迥不相謀稽中散有言一行作吏此事
便已熊魚之味從古難兼唯師儒之官無民社寄
蕭散優閑可以自樂其樂而無害然今官學校者
大率憂貧歎滯戚戚嗟嗟於世資已好蓋兩失之
甚非計也權六張君海昌英雋其才地宜早在雲
霄而俯就司訓擁皋比于烏程宜其邑邑不自得
乃能遙興高寄於談經課藝之餘登臨嘯詠悠優

自適又於署中治隙地雜蒔竹木花果手封土漑
泉驗其情性挹其風姿刻畫摹寫形之篇什清新
妙麗儼若繪圖非夫逸韻高懷中有自得而不撓
於外者孰能若是夫河陽栽花彭澤種秫不失爲
賢令柳惲詠白蘋王元之題芍藥不失賢刺史仕
宦何嘗俗人人亦自俗耳權六誠能不改其樂豈
唯閑散之地然哉卽爲熟官劇職而翛然物外無
不可者彼俗吏烏足以知之松陵潘耒書

大雲樓集

海寧張 韜權六著

清齋六十詠

林檎啓後才推孝威柗榴賦成人思子布
僕也多愁近常藝晚斐然之作雖未逮於
古人偶爾之吟亦時託於繁卉二十四番
芳信花雨半牀一百五日良辰草香十畝
趁譚經之暇還荷長鏡乘劇藥之餘更持
毛穎梨白照隣之宅棗紅子美之牆昔固

有之今亦云然特爲燃髭用供撫掌

紅梅

偏染胭脂帶曉霞羅浮別放一枝斜胡麻洞口無
消息錯向牆東認此花

綠萼梅

銅坑斷碧冷生春絕似仙姬迥出塵六扇窓紗看
一色此中應有倚樓人

臘梅

小於荷瓣圓於磬最愛檀心紫耐攢若到江南逢

驛使莫教輕拆蠟丸看

水仙

小立亭亭放曉叢陳思有賦寫難工涉江定怯春
寒甚好與移栽畫檻東

桃花

賺盡人間采藥人千枝含笑倚江濱種來冷署偏
姚冶不用仙源記避秦

人面桃

粉靨紅潮最可憐小鬟慣摘鏡臺邊乞漿崔護重

來否辜負東風又一年

蝴蝶花

開向牆根暎夕暉
漆園應有夢相依
多情原是青陵種
任撲霜紈只不飛

玉簪花

冰雪天姿姑射粧
粉痕還襯翠羅裳
折來也傍蟬雲插
持比釵梁更有香

夜合花

枝枝斜亞藥欄垂
占得名花百事宜
酒幔河橋風

景換至今夜雨惹相思

瑞香花

小蘂新看幾簇開
畫盆長近石根栽
麝臍囊好何須剪
自有香風遠送來

羅隱有瑞香花詩云剪破麝臍囊因風吹遠去

杏花

紅着枝頭漾茜紈
倚雲傍日一般看
紛紛聽講來
佳客共說名花合有壇

李花

素裳縞袂月邊來
時有霜華點綠苔
夜久張燈人

未醉滿園惟見此花開

花不見桃惟見李唐人句也夜坐燈下始驗其真

幽蘭

空谷無人獨自芳中庭亦復吐幽香
昨宵幾點疎疎雨喜見瑤莖一寸長

蕙蘭

芳叢節節放寒花別是湘江佳種誇
最是滿庭春箭茁開時正鬪雨前茶

茉莉

雪魄冰姿真綽約夜深還向枕函開
須知天馬歌

成後苜蓿來時此也來

酴蘂

當年韻友曾呼汝淡素輕盈誰得同
好與釀成千

斛酒花可煮酒莫愁花事了匆匆

萱花

北堂雨後幾叢抽黃蕊開齊及早秋
萬感縱橫胸次集看花那得便忘憂

石榴

繭虎絲蛟正此時開來如火艷
呆恩猩憐麝妬都

休問只要濃花照酒卮

東坡榴花詩云猩憐冷淡應分血麝妬妖嬈不與香

桂

金粟梢頭簇簇芳
婆娑月下鬪清光
姮娥何事偏教吝
不與一枝天闕香

玫瑰

紫萼開來帶露斜
粧成宜稱插盤鴉
曉光纔見簾前動
便聽街頭喚賣花

茶菊

東籬日日綴花黃
千點叢枝映酒觴
夜半酒醒茶

也熟烹來玉露帶清芳

山茶

冷官每日看蕭淡
只對繁華此樹花
無數枝紅簾外好
壓他桃杏闌穠葩

絳桃

杜鵑聲裏啼來血
染徧枝頭一倍紅
他日漁郎尋舊渡
殘霞片片滿溪東

菊花

地偏心遠稱清齋
獨與秋英日夕偕
一自泉明留

勝賞籬邊真數此花佳
荷花

風簷露檻一般涼
簾捲澄虛漾
渚光三十六陂何處是不如閒署有清香

鑿粟

碎剪綃衣萬種奇
紅黃紫綠闌芳姿
絲絲奪盡人間巧只許閒窺鳥雀知

郁李

輕紅小白綴繁枝
開倚牆根偏反而莫更懷人愁

室遠此花已足惹人思

薔薇

曲曲筠屏傍礪牆
花開高下逞新粧
愛他香艷頻教摘
撩髮鈎衣總不妨

秋海棠

秋深庭角放幽香
小立亭亭易斷腸
最是曉牕新掠髮
簪來一剪露痕涼

白郁李

唐棣呼名認却非
生來愛着素綃衣
人間指粉真

成澹澹冷臨風世自希

月季

灼灼新紅短短枝
亞籬開徧露華滋
誰言零謝花
偏易也有濃香不斷時

雪團

冰心玉質素華交
一片寒光浸樹梢
照水團團泮
似月晚風颺起看高拋

木香

滿架清香近水池
檀心粉瓣綴柔枝
生來雖怕猩

紅染却與薔薇合種宜

秋葵

衛足也能叢鴨綠
向陽聊復側鶯黃
佳人傍晚風
前立一色秋衫漾曲廓

鷄冠

絳幘何煩護曉宮
綵雲朵朵下庭中
看來五色真
成錦黠綴秋光便不同

秋色

望遠秋天澹若空
小庭留得一番紅
最憐賓雁新

來侯搖曳霜枝映畫櫳

菜花

閒課畦丁鋤隙地黃花開徧滿塍香鮑葵周韭餐
來好畢竟於中滋味長

荳花

不及南山種地寬也曾爛熳與人看耐他迎夏高
垂實綠筍朱櫻共一盤

金絲荷葉

墻角繁生漬露濃訝同社酒有奇功
社酒治耳聾此亦能治耳

疾

認渠菌苔新擎蓋却有柔絲颭午風

茄花

蔬甲清和小雨催輕紅淡紫滿枝開配來紫萸同
堆案野藪何妨醉一回

杜鵑

曾聽鈎輈鳥語譁又成小草種溪涯蠻烟瘴雨無
窮恨千古銷魂帝子花

紫荊

紫萼開繁綴滿條墻東一樹未飄蕭同枝連氣天

須惜莫遣名花容易凋

佛見笑

裊露臨風映畫簾
脂紅粉白爾能兼
情深迦葉顏
微破此種應許仔細拈

梧桐

借問何年此樹栽
清颺逸響半天迴
一枝自分卑
棲好辜負亭亭百尺材

竹

新擬龍孫愛翠猗
此君無日不相思
清齋澹泊耽

微祿干畝胸中却最宜

羅漢松

天台濤響起蒼龍
化樹羣呼十八公
恰與應真名
數合古釵還落徑苔中

紫羅蘭

垂囊的的小庭栽
約畧綃衣罷舞回
若問瀟湘無
此種魏家曾見這花來

洛陽花

小草叢生拳石傍
參差碎剪綺羅裳
由來每月花

如錦底事春三問洛陽

俗呼十樣錦詩中有洛陽三月花如錦之句

鳳仙花

自是仙姿迥不同聞簫定見彩雲中夜深搗就麝
脂藥染得麻姑爪盡紅

芭蕉

時看翠袖翩翩舞尙有愁心展未開七尺書床比
牕下一天涼綠晚風來

棣棠

青青萬葉捲牆東俄見花開香散空最是春叢都

爛熳新黃也滿竹屏風

松

五粒須尋仙子宮歲寒兀立雪霜中道書一卷鈎
簾坐日日寒濤落硯東

紫茉莉

點點花香憶魏家石根常見露痕斜生來不是榕
城種却與瓊枝一樣誇

山丹

草本磁盆種恰宜扶渠須用小筠枝愛看碎瓣紅

于火也有輕黃似蜜脾
栢

合與喬松護 聖壇森然蒼翠不凋殘虬枝飽歷
風霜久肅肅天邊起暮寒

蓼花

柔情婀娜折摻摻長共蘋花送去帆小雨輕風池
面過枝枝紅淚浣秋衫

盆梅

寒香總趁雪颺時移種盆間放幾枝依約一痕新

月澹窓紗帳紙夢參差

菖蒲

生時正值春耕候清淺溪邊冒一叢却待天中佳
節至拍浮酒盞興尤濃

艾葉

聞說蘄州最有名牆西也喜碧縱橫剪符貼勝欄
千曲斜映榴花色倍明

蜀葵

盡傳名種出西川紅白紛紛好鬪妍更有一枝深

墨色傾心也向夕陽邊

花中之最富麗者莫如牡丹芍藥而清齋獨

無復拈二絕用申感慨

草就清平若箇誇洛陽空說有名葩誰將富貴名

呼汝遂使清齋斷此花

牡丹

翻影當階金帶圍

芍藥之最佳者名金帶圍紅藥當階翻唐人句也

水邊

折贈晚才迴憶曾飽看豐臺畔千種繁花似錦堆

芍藥

詩餘

昭君怨

牕外芭蕉聲鬧枝上寒鴉眠覺細雨滴空庭一更
更十載邯鄲舊事一枕黑甜初試和夢怨青天
惜鶉鶉

浣溪紗

三杯軟飽破愁城尖側輕寒冷畫屏銀缸搖曳落
紅深簾外風來窺繡幙斷腸衰草怨黃昏天涯
何處不關情

詩餘

眼兒嬌

暖風到處綠垂楊
枝頭梅子黃
碧紗牕下爐烟細
裊檢盡青緗
記得春來梁上燕
來往日雙雙
今朝看取新巢舊壘
乳燕成行

柳梢青

月墮牕紗夜涼人靜
斗轉星斜
簾外風來一聲清
唳驚破天涯
幾番靜數年華
想月珮雲依那家
錦字初傳紅塵欲繫
光黯燈花

滿江紅

月色溶溶斷腸幾處
屏山曲
猛可思故園春老
砌紅堆綠
團扇撲殘螢
火影羅衣暗褪
湘裙幅倚危闌
獨立悄無言
睂峰蹙
柳絲暗桐陰鬱
啼鴉冷吟蛙促
怕關河
中斷夢魂難束
客裡不知家是寄
天涯誰傍人如玉
到今來懶自向
姮娥低聲祝

滿庭芳

孤館風微小牕人靜
挑燈試讀離騷
等閒屈子容易委
寒潮不念聲名俱盡
憤濁世古道寥寥
傷心處九章一哭
清影逐萍飄
幽懷誰與訴
嶺猿嘔

啞沙雁啾嘈嘆冰魂不返雪魄誰招多少騷人才
客總難撇一點孤高憑闌聽嚴城鼓角哽咽度秋
宵

天香

驀地行來水邊籬下微聞拂拂花氣比蘭遜清比
麝遜濁惟有梅花似此仔細探求丰度果然是你
素影籠雲肥瘦清標映日明媚便當買醉花前
醉後也直眠花底任他雨打長楊風吹穠李落盡
長安春色漸枝頭纍纍生梅子綠葉成陰此情何

已

念奴嬌

欺人風雨正小牕枯坐閒愁千斛燕子飛來春去
也遺下珠璣滿幅小字銀鈎柔腸雪併好句憑誰
續焚香細咏頃刻頓忘幽獨從來自負情癡情
歸何處一枕新蕩熟只落得幽懷難寫情字題千
百萬里關山十年華屋魂夢無拘束長堤遙望柳
外落花簌簌

探春慢

人遠天涯一番春色又添一番愁悶
磋玉摧香瘦
紅肥綠憔悴也無人問
只翻階鳥雀花陰外
伴人晝靜小牕幽
夢初迴曉色平開如鏡
長恨青鸞信杳
柰少年辜負惜花情
性翡翠叢中鞦韆影裏
幾點斷霞飛迅
恐鶯聲易老西風緊
漸欺綠鬢蝴蝶成團
淚灑長堤春盡

江南春

春又暮燕還來遠山沉落日
新月上高臺珠幃黯澹
無顏色落盡燈花不忍開

又

人去後亂紅飛子規啼夜雨
蝴蝶點春衣相思欲見
全憑夢魂斷天涯夢不歸

國



